

## **Siunnersummut oqaaseqaatit**

### **Oqaaseqaatit nalinginnaasut**

#### **1. Aallaqqasiut**

##### **Inatsisissatut siunnersuutip tunngavia**

Inuit ataasiakkaat pillugit paasissutissanut tunngatillugu isumannaatsuunissaq Inatsisartut Naatsorsueqqissaartarfik pillugu inatsisaanni nr. 11, 29. oktober 1999-imeersumi § 13-ip ilanganunneratigut sukaammerneqarpoq. Aalajangersakkamut tunngaviupput pisortat naatsorsueqqissaartarnerat pillugu FN-ip tunngavissiai 14. april 1994-imi akuersissutigineqartut aamma EU-p peqqussutaa, nunat EU-mut ilaasortaasut inuit pillugit paasissutissanik nalunaarsuisarneq atuisarnerlu pillugit inatsisaasa annertuumik allanngortiterneqarnerannik kinguneqartoq. Allanngortiterinerup taassuma paasissutissanik nunanut pingajuusunut ingerlatitseqqittarneq pillugu maleruagassanik sukaterinermik arlalitsigut kinguneqassangatinneqartup taamatuttaaq Kalaallit Nunaannut kalluaanissa peratarsinnaasimavoq.

Inuit suliffeqarfiillu pillugit paasissutissanik, ilisimatusarnissaq inatsisinilluunniit piareersa-nissaq siunertalarugu atuisinnaanissaq pillugu Naatsorsueqqissaartarfik akuttunngitsunik saaf-fingineqartarpoq. Ilisimatusartut inuit suliffeqarfiilluunniit pillugit paasissutissanik sukumiiso-rujussuarnik atuisinnaanissartik kissaatigisarpaat. Taamatuttaaq aamma pisortat oqartussaasut maleruagassanik atuuttunik imaluunniit inatsisit nutaat kingunerisinnaasaannik naliliiniarnerminni paasissutissat sukumiisut atorsinnaanissaat kissaatigisarpaat.

Inuit pillugit paasissutissat Naatsorsueqqissaartarfimmut nalunaarutigineqartartut, Inatsisartut Naatsorsueqqissaartarfik pillugu inatsisaata saniatigut pisortat oqartussaasut nalunaarsuiffii pillugit inatsimmi aalajangersaaffingineqarput. Inatsit taanna naapertorlugu suliarineqarnikuupput Naatsorsueqqissaartarfiup nalunaarsuiffii pillugit nalunaarsuinermi malittarineqartussat. Nalunaarsuinermi malittarineqartussat taakku ilaat, nalunaarsuinermik nakkutilliisoqarfiup (Datatilsynip) akuersissuteqarneratigut nalunaarsuiffinnut, naatsorsueqqissaarnissamut ilisi-matuussutsikkulluunniit atugassatut immersorneqarsimasunut ingerlatitseqqisarnissamik peri-arfissiipput. Datatilsynip akuersissutinik taamaattunik tunniussinermini assigiinngitsunik piu-masaqaateqartarpoq, matumaní aamma akuersissutinik peqartut paasissutissanik inuit kikkunerinik takussutissiinnaasunik ingerlatitseqqittannginnissaat pillugu, aammalú paasissutissat siunertanut allanut, paasissutissat tunniunneqarneranni siunertaasunit allaasunut atorneqan-ginnissaat soorluttaarlu paasissutissat suli allanut ingerlateqqinnejqannginnissaat pillugit piu-masaqaatit.

Inatsisartut Naatsorsueqqissaartarfik pillugu inatsisaanni § 13-ip, pisortat oqartussaasut nalunaarsuiffii pillugit inatsit tunngavigalugu ukiorpassuarni periuserineqartoq malillugu inuit pil-

lugit paasissutissanik, ilaatigut ilisimatusarnernut atugassanik ingerlatitseqqittarsimanerup ingerlatiinnarneqarsinnaaneranut aporfiusinnaanera maanna apeqquserneqarsimavoq. Tunngavissaq pillugu apeqqutaaleroq eqqartuussivinni misilinneqarsimanngilaq allatulluunniit akuerisaanera pillugu aalajangiiffingineqarsimanani. Inatsisissatut siunnersuut manna qularutiginnilernermut aaqqissutissatut siunniussaavoq aammalu Inatsisartut Naatsorsueqqissaartarfik pillugu inatsisaata ukiorpassuarni periuserineqarsimasumik, pisortat oqartussaasut nalunaarsuifffi pillugit inatsit naapertorlugu ineriertorsimasumik ingerlatsiinnarsinnaanermut aporfiusenginneranik erseqqissaaniarneruvoq.

Danmarkimi Danmarks Statistikip ilisimatusarnernut aaqqissuussineq aqqutigalugu suliffeqarfiiut ilisimatusfiusutut akuerisaasut paasissutissanik, ilisimatusarnernut misissueqqissaarnernullu aalajangersimasunut atugassaannik atugassittarsimavai. Inuit ataasiakkaat pillugit paasissutissanik ilisimatusartunut atugassiineremi paasissutissat kimut tunngasuuneri paasineqarsinnaajunnaarsagaasarput, taamaallillutik inuit, suliffeqarfiiut najukkat il.il. takuneqarsinnaajunnaarsinneqartarlutik.

## 2. Siunnersuutip imarisai pingaarcerit

Naatsorsueqqissaartarfiuup paasissutissanik ilisimatusarnernut inatsisinilluunniit piareersaanerut atugassanik ingerlatitseqqittarnera pillugu qularutiginnilersimaneq allannguutissatut siunnersuutikkut aaqqinniarneqarpoq.

Naatsorsueqqissaartarfiuup inuit ataasiakkaat suliffeqarfiiillu pillugit paasissutissanik ilisimatusarnermi inatsisinilluunniit piareersaanermi atorneqartussanik ingerlatitseqqissinnaanera inatsisissatut siunnersuutikkut erseqqissarneqarpoq. Naatsorsueqqissaartarfiuup ilisimatusarnernut aaqqissuussinernik akuersissuteqartarnermilu aaqqissuussinernik, Danmarks Statistikituulli pilersitsisinnaalernissaa inatsisip allanngortinneqarneratigut siunniussaavoq.

Ilisimatusartut allallu Naatsorsueqqissaartarfiuup paasissutissaatai atorlugit sulisussat tatiginasutsimut, toqqortarinninnissamut tunngasut pillugit kiisalu paasissutissanik ingerlatitseqqin-nissap inerteqquutanera pillugu piumasaqaatinik ilisimatinneqarnissaat piumasaavoq. Tassa imaappoq Naatsorsueqqissaartarfiuup aamma suliffeqarfiiut, naalakkersuisoqarfiiut il.il. paasissutissanik pisut akornanni, akuerisaaneq pillugu ingerlatitseqqittarnerillu pillugit allaganngorlugu isumaqtigiissusiortoqartarnissaa naatsorsuutaavoq. Aamma paasissutissanik ingerlatitseqqinnissaq pisortat oqartussaasut nalunaarsuiffii pillugit inatsit malillugu pissappat Datatilsyni akuersisinneqaqqaartassaaq.

Aammattaaq siunnersuutigineqarpoq Naatsorsueqqissaartarfik paasissutissanik misiligutitut tigusanik immikkoortitsisinnaassasoq. Pisortat oqartussaasut il.il., ilaatigut suliffeqarfiiut misissueqqissarnermik suliaqartartut il.il. ikiortigalugit, pissutsit assigiinngitsut innuttaasunut tunngasut akuttunngitsumik misissuiffigisarpaat. Assersuutitut taaneqarsinnaavoq inuit peqqissusiannik misissuineq. Misissuinissaq taamaattoq ingerlanneqarsinnaassappat innuttaasut misissuinissamut pineqartumut peqataatitassat naammattut toqqarneqartussaapput. Siunnersuutip siunertaraa Naatsorsueqqissaartarfiuup, innuttaasut peqataasussatut toqqagassat naam-

mattut toqqarneqarnissaanni inuttut normut pisariaqartut atugassiissutigisassagai. Taakkunannissaaq paasissutissanik ingerlatitseqqinnissaq pisortat oqartussaasut nalunaarsuiffii pillugit inatsit malillugu pissappat Datatilsyni akuersisinneqaqqaartassaaq.

Peqqinnissaqarfik innuttaasut inunngorneri pillugit nalunaarutit imaluunniit toqneri pillugit paasissutissat eqqortuunerinik aalajangiisussaatilluni ilaanneeriarluni Naatsorsueqqissaartarfimmit ikiorneqarnissamik qinnuteqartarpooq. Naatsorsueqqissaartarfip taamatut ikuusarnerminik ingerlatsiinnarsinnaanissa siunnersuutaavoq.

Naatsorsueqqissaartarfip siulersuisusa paasissutissanik ingerlatitseqqittarnermi suleriaatsinik erseqqinnerusunik aalajangersaanissamut piginnaatinneqarnissaat siunnersuutaavoq. Paasissutissanik ilisimatusarnissamut inatsisinilluunniit piareersaanissamut atugassanik tunineqarnissamik qinnuteqaatit pisuni qanoq ittuni Naatsorsueqqissaartarfimmit itigartinneqarsinnaanerat siulersuisut ilaatigut erseqqissarsinnaavaat.

Siunnersuut inatsimmut atuuttumut sanilliullugu	
Oqaasertai atuuttut	Siunnersuut
	<p style="text-align: center;"><b>§ 1</b></p> <p>Inatsisartut Naatsorsueqqissaartarfik pillugu inatsisaanni nr. 11, 29. oktober 1999-imeersumi makku allannguutigitinneqarput:</p>
<p><b>§ 13.</b> Inuit ataasiakkaat suliffeqarfiilluuniit ataasiakkaat pillugit paasissutissat Naatsorsueqqissaartarfip §§-ini 10 aamma 11 naapertorlugit pissarsiarisai allanut ingerlateqqinneqassanngillat.</p>	<p><b>1.</b> <i>§ 13-imi imm. 2-miit 6-imut</i> nutaatut ilanngunneqarput:</p> <p><i>"Imm. 2. Imm. 1-imi aalajangersagaq atuutissanngilaq paasissutissat ilisimatusarnermi inatsisinilluunniit piareersaanermi atugassat ingerlateqqinneqarpata, paasissutissat ilisimatusarnerup inatsisinilluunniit piareersaanerup pineqartup pisinnaanissaanut pisariaqartinneqarpata.</i></p> <p><i>Imm. 3. Imm. 1-imi aalajangersagaq aamma atuutissanngilaq inuit normuinik, innuttaasut pillugit misissuilluni naatsorsuinerni atorneqartussanik misiligutitut makitsinerni.</i></p> <p><i>Imm. 4. Imm. 1-imi aalajangersagaq aammattaaq atuutissanngilaq paasissutissat tas-saappata peqqinnissaqarfip, inuit inunngornerinik nalunaarutit sumillu toqquteqarneri pillugit paasissutissat eqqortuunerannik qu-lakkeerinissamut atugassai.</i></p>

	<p><i>Imm. 5. Imm. 2 3 naapertorlugu ingerlatitseqqinnermi inuit ataasiakkaat suliffeqarfiillu ataasiakkaat aqqi, najugaat, inuttut normui, suliffeqarfittut normui paasissutissallu assingusut, inuup suliffeqarfiilluunniit kinaane-ranik takussutissiisinnaasut piiarneqarsimas-sapput.</i></p> <p><i>Imm. 6. Paasissutissanik imm. 2-miit 4-mut pineqartunik ingerlatitseqqittarnermi suleri-aasissat erseqqinnerusut Naatsorsueqqissaar-tarfiup siulersuisusa aalajangersarsinnaa-vaat, matumani aamma aalajangersarsinnaal-lugu ilisimatusarnermi atugassanik ingerlatit-seqqittarneq taamaallaat pisinnaasoq, ilisima-tusarneq pineqartoq pillugu suleqatigiinnis-saq ilisimatusarfimmut Kalaallit Nunaan-neersumut nunanilluunniit avannarlermeer-sumut akuerisaasumut isumaqatigiissutigine-qarpat.”</i></p>
	<p>§ 2</p> <p>Inatsisartut inatsisaat 1. januar 2016-imi atortuulissaq.</p>

### **3. Pisortanut aningaasatigut allaffissornikkullu sunniutissai**

Siunnersuut Naatsorsueqqissaartarfimmi allaffissornikkut suliassanik annikillisitsilaassanga-tinneqarpoq, tassa ilisimatusarnermik akuersissuteqartarnermillu aaqqissuussinernik pilerssi-nerup kingunerisaanik.

Siunnersuulli pisortanut aningaasatigut sunniuteqassangatinneqanngilaq.

### **4. Inuussutissarsiutinik ingerlataqartunut aningaasatigut allaffissornikkullu sunniutissai**

Siunnersuutip inuussutissarsiutinik ingerlataqartunut sunniuteqangaarnissaa naatsorsuutigine-qanngilaq.

## **5. Avatangiisinut, pinngortitamut inuillu peqqissusiannut sunniutissai**

Siunnersuutip avatangiisinut aamma/imaluunniit pinngortitamut sunniuteqangaarnissaa naatsorsuutigineqanngilaq.

Aamma siunnersuutip inuit peqqissusiannut sunniuteqarnissaa naatsorsuutigineqanngilaq.

## **6. Innuttaasunut sunniutissai**

Siunnersuutip innuttaasunut sunniuteqangaarnissaa naatsorsuutigineqanngilaq.

## **7. Sunniutissai pingaarutilinnik allat**

Siunnersuutip pingaarutilinnik allanik sunniuteqarnissaa naatsorsuutigineqanngilaq.

## **8. Oqartussaasunik kattuffinnillu il.il. tusarniaaneq**

Siunnersuut 2015-imi piffissami 2. junimut ukununnga tusarniaassutigineqarpoq:

SIK, Sulisitsisut (Grønlands Erhverv), NUSUKA, KANUKOKA, Naalakkersuisut Siulittaasuta Naalakkersuisoqarfia, Aatsitassanut Ikummatissanullu Naalakkersuisoqarfik, Inuussutisarsiornermut, Sulifeqarnermut Niuernermullu Naalakkersuisoqarfik, Peqqissutsimut Naalakkersuisoqarfik, Aalisarnermut, Piniarnermut Nunalerinermullu Naalakkersuisoqarfik, Ilaqutariinnermut, Naliqissitaanermut Isumaginninnermullu Naalakkersuisoqarfik, Ilinniartitaanermut, Kultureqarnermut, Ilisimatusarnermut Ilageeqarnermullu Naalakkersuisoqarfik, Pinngortitamut, Avatangiisinut Inatsisinillu Atuutsitsinermut Naalakkersuisoqarfik aamma Ineqarnermut, Sanaartornermut Attaveqarnermullu Naalakkersuisoqarfik, kiisalu aamma Naalakkersuisut internetikkut tusarniaaviatigut.

Tusarniaanermi akissutisiffigineqarput Sulisitsisut (GE), KANUKOKA, Naalakkersuisut Siulittaasuata Naalakkersuisoqarfia, Peqqissutsimut Naalakkersuisoqarfik, Ilaqutariinnermut, Naliqissitaanermut Isumaginninnermullu Naalakkersuisoqarfik, Ilinniartitaanermut, Kultureqarnermut, Ilisimatusarnermut Ilageeqarnermullu Naalakkersuisoqarfik, Pinngortitamut, Avatangiisinut Inatsisinillu Atuutsitsinermut Naalakkersuisoqarfik aamma Nunatsinni Nakorsaaneqarfik.

Tusarniaanermi akissutigineqartut imaattunik oqaaseqaateqarfingineqarput:

Inunngortoqarneranik aamma sumik toqquteqartoqarneranik nalunaarsuiffimmi paasissutissat eqortuunissaat qulakkeerumallugu, Naatsorsueqqissaartarfillu paasissutissanik taartigeeqatiittooqartarnerata pinngitsoorani allassimanissaa Nunatsinni Nakorsaaneqarfuiup oqaatigaa.

*Siunnersuut malinneqarpoq, inatsisisamullu ilanngunneqarluni. Nunatsinni Nakorsaaneqarfik taaguummi "peqqinnissaqarfik"-mi pineqartunut ilaasutut matumani isigineqarpoq.*

KANUKOKA-p § 13-imni allannguutit akerlilerfissaqartinnginnerarpai, inuilli pillugit paasisutissat isertuussassaanerat pingaartusoq peqatigitillugu erseqqissaatigaa, siunnersummilu § 13, imm. 5 eqquutsinniarneqartussaanerarlugu.

Tusarniarneqartut allat tusarniaanermi akissuteqartut siunnersummut oqaaseqaatissaqanngilat.

## **Aalajangersakkanut ataasiakkaanut oqaaseqaatit**

### *§ 1-imut*

*Nr. 1-imut (imm. 2-6).*

Imm. 2.

Siunnersuutaavoq paasissutissanik ilisimatusarnermi inatsisinilluunniit piareersaanermi atugassanik ingerlatitseqqittooqartarnissaanut tunngavissiisoqarnissaa, paasissutissat ilisimatusarnerup inatsisinilluunniit piareersaanerup pineqartup pisinnaanissaanut pisariaqartinneqarpata.

Ingerlatitseqqinneq paasissutissanik kinaassusersineqarsinnaanngitsutut taaneqartunik imaqarsinnaavoq, tak. ataani imm. 5 pillugu.

Ilisimatusarneq tassaatinneqarpoq ilisimaneqareersut amerlisarniarlugit aaqqissuussaasumik tunngaveqarluni sulinermik ingerlatsineq. Ilisimatusarneq nutarsiassaqartitsissaaq. Ilisimatusarneq tunngaviusumik ilisimatusarnermut ilisimatusarnermillu atuinermut agguataarneqarsinnaavoq.

Inatsisinik piareersaaneq tassaatinneqarpoq Namminersorlutik Oqartussani naalakkersuisoqarfiiit inatsisini maleruagassanik, nalunaarutinik, kaajallaasitanik assigisaannillu nutaanik pisariaqarttsisoqarneranik naliliinissaq aammalu maleruagassat allangortinneqartut kingunerisaannik qulaajaanissaq siunertaralugit sulinerat.

Paasissutissanik ingerlatitseqqinnissaq pisortat oqartussaasut nalunaarsuiffii pillugit inatsit malillugu pissappat Datatilsynip akuersisinneqqaartarnissaa piumasaqataavoq.

Imm. 3.

Siunnersutigineqarpoq Naatsorsueqqissaartarfik paasissutissanik misiligtutut tigusanik im-mikkoortitsisinnaassasoq. Siunnersuutip kingunerissavaa Naatsorsueqqissaartarfiup, innuttaasut peqataasussatut toqqagassat naammattut toqqarneqarnissaanni inuttut normut pisariaqartut atugassiissutigisinnaassagai. Misiligtissanik tigusinermi toqqammavissat tunngaveqarluartuussapput. Assersuutit makkua maleruagassamut pingaarningerput akerliunngitsut toqqamma-vissaapput tunngaveqarluartut:

Arnaaneq/angutaaneq, ukiut, tikissimasut/aallarsimasut, nunamit allamit/nunamut allamut nuuttut, nunap ilaani sumiiffik (najugaralugu imaluunniit suliffagalugu), naalagaaffinnut innuttaassusillit, nunanit allanit nunasisuuneq, suliaq (suunera, atorfik, inuiaqtigijiinni aningaa-sarsiornikkut sumi inissisimaneq), ilinniagaq, aningaasarsiat, ineqarnermut tunngasut, anger-larsimaffimi ikiorteqarneq, pinaveersaartitsilluni angerlarsimaffinnut pulaartarneq, mee-qanik ulluunerani paaqqinniffiit suuneri, qamutinik motoorilinnik pigisaqarneq.

Paasissutissanik ingerlatitseqqinnissaq pisortat oqartussaasut nalunaarsuiffii pillugit inatsit malillugu pissappat Datatilsynip akuersisinneqaqqaartarnissaa piumasaqataavoq.

Imm. 4.

Inunngortoqarneranik nalunaarutit aamma toqqutigineqartut pillugit paasissutissat tutsuiginartuunissaat il.il. qulakkeerumallugu siunnersuutaavoq Naatsorsueqqissaartarfik paasissutissanik peqqinnissaqarfimmut ingerlatitseqqissinnaassasoq.

Innuttaasut inunngortarneri toqusarnerilu pillugit paasissutissat eqqoqqissaartuunissaat siunertaralugu Naatsorsueqqissaartarfipi Nunatsinni Nakorsaaneqarfimmik suleqateqarnissaa pisariaqarsinnaavoq. Paasissutissatigut tunngavissat suunngitsuarannguanilluunniit amigaateqarpata tamanna, assersuutigalugu naalungiarsuit toqusarnerat pillugu eqquunngitsunik paasissutissaateqartoqarneranik kinguneqarsinnaavoq. Paasissutissat pigeeqartut pitsasuunissaat, paasissutissat paasissutissaasivinnit arlalinneersut atornerisigut qulakkeerneqassaaq.

Imm. 5.

Siunnersuutaavoq imm. 2 naapertorlugu paasissutissanik ingerlatitseqqinnej paasissutissanik kinaassusersineqarsinnaanngitsutut taaneqartunik imaqarsinnaasoq. Paasissutissat kinaassusersineqarsinnaanngitsut tassaapput kinaanermut toqqaannartumik paasissutissaasinaasut tamarluiinnarmik ingerlateqqinnejqannginnerminni ilisarnarunnaarsagaasut. Paasissutissat toqqaannartumik kinaassusersinninnissamut atorneqarsinnaasut tassaapput inuttut normut, suliffeqarfittut normut, atit, najukkat paasissutissallu assigisaat, suliffeqarfiup inuulluunniit aala-jangersimasup toqqaannartumik kinaassusersinissaanut atorneqarsinnaasut.

Paasissutissat kinaassusersineqarsinnaanngitsut paasissutissanit ilisarnarunnaarsakkanit allaassutigaat, paasissutissanik tigusisut paasissutissat tigusatik paasissutissallu allat ilaanneeriarlutik naleqqersuussinnaasarmatigik, tassuunakkullu inuup suliffeqarfiulluunniit kinaassusia annerusumik minnerusumilluunniit tunngavilimmik ilimatsaassinjaallugu. Paasissutissat atorneunneqarnissaat pinaveersaartinniarlugu naatsorsuutaavoq Naatsorsueqqissaartarfipi aamma suliffeqarfiit, naalakkersuisoqarfiit il.il. paasissutissanik pisut akornanni, akuerisaaneq pilugu ingerlatitseqqittarnerillu pillugit allaganngorlugu isumaqatigiissusiortoqartassasoq naatsorsuutaavoq.

Naatsorsueqqissaartarfipi paasissutissanik ingerlatitseqqittarnera tatiginninnermik tunngaveqarpoq paasissutissanillu tigusaqartut nipangiuilluinnartussaatitaallutik, ilaatigut tak. suliassat suliarineqartarnerat pillugu inatsimmi § 27.

Imm. 6.

Siunnersuutaavoq Naatsorsueqqissaartarfipi siulersuisui paasissutissanik, imm. 2-miit 4-mut naapertorlugit ingerlatitseqqittarneq pillugu erseqqinnerusunik maleruagassiornissamut pigin-naatinneqassasut. Paasissutissanik ilisimatusarnissamut inatsisinilluunniit piareersaanissamut

atugassanik ingerlatitseqqittoqarnissaanik qinnuteqaatit pisuni qanoq ittuni Naatsorsueqqisaartarfimmit itigartinneqarsinnaanerat siulersuisut ilaatigut erseqqissarsinnaavaat.

Ilisimatusartut paasissutissanik tunineqassagunik ilisimatusarfimmik Kalaallit Nunaanniittumik nunanilluunniit avannarlerniittumik akuerisaasumik suleqateqarnissamik isumaqatigiissuteqarsimanissaat siulersuisut ilaatigut maleruagassatut aalajangersarsinnaavaat. Akuerisaasutut isigineqartut ilaatigut tassaapput ilinniarfiit ilinniakkanki ilisimatusaatitut ingerlanneqartunik, Kalaallit Nunaanni nunalluunniit avannarliit arlaanni allami pisortanit akuerisaasunik neqerooruteqartut. Soorlu suliffeqarfiiit internetimiittut ilinniaqqiffiusumik ilinniarfiunerarlutik nittarsaattut akuerisaasutut isigineqassangillat, ilinniakkat il.il. neqeroorutigisaat Kalaallit Nunaanni nunalluunniit avannarliit arlaanni allami pisortanit akuerisaangippata. Ilinniarfiit ilisimatusarfiusutut isigineqartut tassaapput universitetit, ilisimatusarfiiit imaluunniit ilinniarfiit allat, ilisimatuussutsikkut teknikkikkullu ilisimasat, matumani aamma inuit, kulturi inuiaqatigiillu pillugit ilisimasat annertusarnissaannik siunertaqarluni ilisimatusarnermik ineriarortsinermillu aaqqissuussaasumik ingerlatsiffiusut – kiisalu ilisimasat pioreersut tunngavigalugit qanoq atuisoqarsinnaaneranik nutaaliorfiusut.

Nunat avannarliit tassaapput Sverige, Danmark, Finland, Norge, Island, Savalimmiut aamma Ålandip Qeqertai.

### *§ 2-mut*

Inatsisartut inatsisaata 1. januar 2016-imi atortuulernissaa siunnersuutaavoq.